

Incumbensa Koch concernent mesiras da promoziun a vista mesauna per dumagnar la situaziun economica

Entant che l'emprim lockdown n'ha betg chaschunà in donn economic gravant en il chantun Grischun, ha il segund lockdown tutgà sin il viv l'economia dal Grischun. Pervia da la gronda impurtanza dal turissem d'enviern per l'economia publica è il donn ch'è vegnì chaschunà da la pandemia dal coronavirus e dal lockdown pli grond en il chantun Grischun che en auters chantuns. Tenor las calculaziuns dal Forum economic dal Grischun dastgass mancar a las interpresas en il chantun circa ina milliarda francs per cuvrir ils custs da gestiun e las investiziuns dals onns 2020 e 2021. L'indemnisaziun per lavur reducida ch'è necessaria existenzialmain per l'economia e l'indemnisaziun per la perdita da gudogn pervia dal coronavirus èn gia resguardadas en questas calculaziuns.

Igl è evident ch'intginas branschas èn fermamain pertutgadas e dovran uschè svelt sco pussaivel agids dal stadi. Cunzunt interpresas ch'èn vegnidas serradas dal tutfatg u per part tras las autoritads, dovran indemnisaziuns da la perdita en furma da contribuziuns betg restituiblas. Cun ils agids per cas da direzza qua avant maun vegnan instradadas questas mesiras da sustegn a curta vista.

L'existenza da manaschis cun gronds custs fixes n'è betg mo periclitada, sche la svieuta è reducida per passa 40 %, mabain er sche tala è pli bassa, particularmain, sch'ils meds finansials che vegnan realisads, èn durant plirs onns sut la media. Tals manaschis existan actualmain en il Grischun cunzunt èn las chadainas da creaziun da valurs turisticas. Sche plirs manaschis da talas chadainas da creaziun da valurs èn periclitads en lur existenza, pon las consequenzas per l'economia publica qua e là esser fitg grondas, cunzunt sche blers manaschis ston prender a medem temp mesiras da sanaziun e da restructuraziun u sche manaschis ston schizunt vegnir liquidads.

Sin basa da questas explicaziuns incumbensain nus la Regenza:

1. D'elavurar in program, las basas legalas correspondentas sco er il rom finanziel respectiv per promover finanzielmain ed en moda prospectiva las interpresas che n'han betg survegnì agids per cas da direzza, ma che han subì in grond donn finanziel pervia da la pandemia dal coronavirus u pervia da las consequenzas da tala a vista mesauna, sche las interpresas
 - èn impurtantas per l'economia regiunala u chantunala tras lur activitad d'investiziun, tras lur posiziun en la chadaina da creaziun da valurs u tras lur potenzial economic;
 - èn profitablas u capablas da survivor;
 - survegnan ulteriur agen chapital dals proprietaris u sche donaturs da chapital ester desistan da lur pretensiuns;
 - e pon cumprovar ch'il donn economic è resultà pervia da la pandemia dal coronavirus.
2. Las suandantas valurs directivas ston vegnir resguardadas cun elavurar il program:
 - Il program sto star liber a tut ils manaschis en il chantun che adempleschan ils criteris, independentamain da lur grondezza u da lur branscha.
 - La trasparenza da las surdadas sto esser garantida.
 - Vegnir concedids duain tant emprests sco er contribuziuns betg restituiblas.
 - Las indemnisaziuns duain vegnir calculadas resguardond il niz per l'economia publica.
 - La Confederaziun duai vegnir supplitgada da surpigliar ina part da questas indemnisaziuns.
 - Las federaziuns economicas e las federaziuns da branscha duain vegnir integradas en l'elavuraziun dal program.
 - Las mesiras han ina clera limita temporara.

Tavau, ils 18 da favrer 2021

Koch, Hohl, Bettinaglio, Caviezel (Cuir), Clalüna, Della Cà, Dürler, Ellemunter, Favre Accola, Felix, Flütsch, Gartmann-Albin, Gort, Hefti, Horrer, Jochum, Kasper, Loi, Niggli (Samedan), Perl, Rüegg, Salis, Schutz, von Ballmoos, Weber, Renkel, Spadarotto